

Ummannap talittarfiani aserfallatsaaliuisoqarnissaa ujaqqanillu nunniukkamik malinnut illersuusiortoqarnissaa pillugu AI 19-imut salliutitseqqullugut Naalackersuisut peqquneqarnissaannik Inatsisartut aalajangiiffigisassaattut siunnersuut

(Inatsisartuni ilaasortaq Jess Svane, Siumut)

Akissuteqaat

(Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalackersuisoq)

Siullermeerneqarnera

Naalackersuisut sinnerlugit Inatsisartuni ilaasortaq Jess Svane Siumummeersoq aalajangiiffigisassatut siunnersuuteqarneranut qutsavigaara.

Aallarniutigalugu ilisimatitsissutigisinnaavara, umiarsualivinnut talittarfeqarfinnullu aningaasaleeqqinnermi aserfallatsaaliuinnermut suliniutini ingerlaavartuni ilaatigut Ummannami iluarsaassinissat arlalinnik peqquteqartumik ukiumik ataatsimik kinguartinneqartariaqarsimmata. Talittarfiilli qanoq issusiinik nalunaarsuinerit pilersaarutit malillugit ingerlapput.

Aallaqqaammut Qeqertarsuup Tunuani umiarsualiveqarfinnik iluarsaassinerit 2016-imi aammalu Avannaata immikkoortuani 2017-imi aallartinneqarnissaat siunnerfigineqaraluarpoq. Kisiannili suliffeqarfinnik sanaartugassanik suliaqartartunik Qeqertarsuup Tunuani 2016-imi iluarsaassinissanut neqerooruteqartoqarsimangimmat, ajoraluartumik Qeqertarsuup Tunuani taamatullu Avannaata immikkoortuani iluarsaassinissanut pilersaarutit ukiumik ataatsimik kinguartittariaqarsimapput.

Qeqertarsuup Tunuani iluarsaassinerit 2017-imi aallartinneqarput, aammalu Avannaata immikkoortuani iluarsaassinissat 2018-imi aallartinneqarnissaat naatsorsuutigineqarpoq. Erseqqissaatigineqassaaq, nunap immikkoortuini marluusuni iluarsaassat aningaasaqarnermut sinaakkusiussat, aningaasanut inatsimmi kontomi pingaarnermi 87.73.12 Umiarsualivinnut talittarfeqarfinnullu aningaasaleeqqinnerit immikkoortinneqartut iluanni ataatsikkut ingerlanneqarnissaat inissaqartinneqanngimmat.

Ummannami talittarfeqarfimmi ingerlaavartumik aserfallatsaaliuinerit pilersaarutaasut ingerlanneqarnissaat apeqqutaatinnagu, talittarfeqarfimmik nutaamik sananissarpiamut aningaasanik immikkoortitsisoqarsimangilaq. 2018-imut aningaasanut inatsisissatut siunnersuummi 27,7 millionit korusut, umiarsualivinnut talittarfeqarfinnullu aningaasaleeqqinnissamat immikkoortinneqartut pingaartumik talittarfeqarfinni pioreersuni aserfallatsaaliuinnermut ingerlaavartumut immikkoortinneqarsimapput. Ummannami nutaamik sapsuortoqassappat, kiisalu sinerissami isumannaallisaasoqassappat, ukiumi tullerni

anigaasanut inatsisissani anigaasanik, sanaartornermut immikkut atugassanik immikkoortitsisoqartariaqarpoq.

Nuugaatsiami Illorsuarnilu pisut alianaqisut kingunerisaannik atueriaatsimut allanngortumut, nunap immikkoortuani attaveqatigiinnerup qanoq naleqqussarneqarsinnaanera, piaartumik misissorneqarnissaa pisariaqartinneqarpoq. Tassunga ilanngullugu umiarsualiveqarfinnik nutaanik pisariaqartitsineq allanngortoq qanoq iliorluni pitsaanerpaamik naammassineqarsinnaanersoq misissorneqassaaq.

Naalakkersuisut Uummannami pisariaqartitanik misissuineramik piaarnerpaamik aallartitsiniarput, tamatumalu kingorna atueriaatsimut allanngortumut naammassinniffiusinnaasumik, pilersaarusiorsinnaaneq aallartissallugu. Misissuineq pilersaarusiorterlu 2018-imut anigaasaliissutit iluanni ingerlanneqarsinnaapput, taamaalillunilu sanaartugassat 2019-imut Anigaasanut Inatsisissatut Siunnersuutip suliarineqarneranut atatillugu tulleriarinermit ilanngunneqarsinnaallutik.

Suliassap anigaasanut inatsimmut ilanngunneqarnissaa sioqqullugu suliassat suut ilanngunniarneqarnersut eqqortumik nassuiaatigineqarnissaat pisariaqarpoq, pilersaarusiaq tunngavigalugu akinut missingersuusiortoqassaaq, kiisalu sanaartugassamut akigititassaq anigaasanut inatsisissami tulleriarinermit nalinginnaasumut ilanngunneqassaaq.

Umiarsualiviup ilusissavia ilisimaneqanngimmat, aammalu tulleriarisoqarnissaa suliarineqanngimmat, siunnersuutip saqqummiunneqartup allanngortinneqarnissaa Naalakkersuisut kissaatigaat, aammalu allannguutissatut siunnersuummik imaattumik saqqummiussisoqarnissaa kissaatigalugu:

”Sanaartornermut anigaasartuutit ukiuni tulliuttuni anigaasanut inatsisissani tulleriarinermit ilanngunneqarnissaat siunertaralugu Naalakkersuisut qinnuigineqassapput, piaartumik Uummannami umiarsualiveqarfimmi iluarsagassanut anorimullu oqqiorfinnik pisariaqartitanik misissueqqullugit taakkunanilu suliassanik tulleriarereqqullugit.”

Naalakkersuisut siunnersuutip oqallisigineqarluarnissaanut qilanaarput.